



Bentiaraq Ottosen  
Atassut

UKA 2023/39  
04. oktober 2023

**Nunat assigiinngitsut akornanni timmisartuni atortussiatigut isumannaatsuunissamik  
pisinnaatitaaffeqarnermut inatsisip Kalaallit Nunaanni atuutilersinneqarnissaanik  
peqqusummik Kalaallit Nunaanni Namminersorlutik Oqartussat akuersissuteqarnissaat  
pillugu Inatsisartut aalajangiiffigisassaattut siunnersuut**  
(Ineqarnermut Attaveqaasersuutinullu Naalakkersuisoq)

### **Siullermeerneqarnera**

Nunat assigiinngitsut akornanni timmisartuni atortussiatigut isumannaatsuutitsinissamik pingaartitsineq aallaavigalugu nunatsinni inatsisimik atuutitsilersinneqarsinnaasumik peqqussuteqarneq pillugu akuersinissaq pingaaruteqarluinnarpoq.

Siunissami isumannaatsumik inissisimanissarput siunertaralugu ingerlasariaqarpugut, assersuutiginnartigu nunani assigiinngitsuni timmisartortitseqatigiiffiit nunatsinnukarusuttut eqqarsaatigineqarsinnaapput. Pingaarnertut taaneqarsinnaavoq nunatsinni timmisartortitseqatigiiffiit nunarsuarmioqativut tikilluaqqusariaqarpavut, tamanna unammilleqatigiinnermut aqutissanik matunik nutaanik ammaasussaammat, unammilleqatigiinnerli nunatsinni piuppat pitsaasumik ilaasunik angallassinermut isumaqatigiissutit pineqartut pitsanngoriaataasinnaasunik imaqartussaammata.

Pingaaruteqarpoq tamakkunangga piareersarnissarput, ullumikkut silaannakkut aammalu imaatigut angallanneq akisuupilussuovoq. Naleqqussaasariaqarpugut ullumikkut nunatsinni maani angallanneq qanoq issusia najoqqutaralugu nalilersuiinnarata unammilleqatigiinneq atuutilertariaqarparput, qulakkeerumallugu Kalaallit Nunaat nunarsuarmioqatitsinnut ammanerulernissaa anguniarlugu.

Mittarfissuit pingasut sanaartorneqartut eqqarsaatigalugit, siunissami avammut attaveqaataasussatut takorluugaapput. Tamakkuli tamaasa eqqarsaatigalugit timmisartortitseqatigiiffiit nunani allaneersut ammaattariaqarpavut toqqaanarnerusumik niueqatigiinneq angujumallugu, ila nunatsinni kisermaassisussaataaneq qimattariaqalerparput tamanna pingaarnersiunitsinni sallerfaatillugu kaattariaqarparput.

Ammanerulernissatsinnik oqariartortartilluta tamanna piviusunngortittariaqarparput, unali peqqussutaannaagaluartoq neriuppunga tusarnaarneqarluta pissasugut.

Una siunnersuut Atassummiit taperserparput ataatsimiititaliamut susassaqtumut innersuullugu.